

## ՀԱՅԱՍՏԱՆԻ ՀԱՆՐԱԿՐԹՈՒԹՅԱՆ ԿՐԹԱԿԱՐԳԸ ԵՎ ՊԵՏԱԿԱՆ ՉԱՓՈՐՈՇԻՉՆԵՐԸ

### Մանուկ Մկրտչյան

#### *Նախաբան*

Մեկ տարի առաջ ԿԳ նախարարությունը և ՀԲ կրթական ծրագրերի կենտրոնը (ԿԾԿ) ձեռնամուխ եղան հանրակրթության պետական չափորոշիչների մշակմանը: Այդ նպատակով մրցութային հիմունքներով ստեղծվեց աշխատանքային խումբ, որը մշակեց և հանրային քննարկման ներկայացրեց «Հանրակրթության պետական կրթակարգը» փաստաթուղթ-նախագիծը [1]: Հանրային քննարկման հիման վրա այն վերամշակվեց և ներկայացվեց կառավարության հաստատմանը: Արդյունքում՝ կառավարությունը հաստատեց կրթության ոլորտին վերաբերող հերթական կարևոր փաստաթուղթը [2]:

Այս իրողությունները տեղիք են տալիս մի շարք հարցադրումների:

**Առաջին.** որքանով էին անհրաժեշտ ու անհետաձգելի հանրակրթական կրթակարգի մշակումը և նոր պետական կրթական չափորոշիչների ստեղծումը:

**Երկրորդ.** ի՞նչ իմաստ ունեին նախագծի հանրային քննարկումները և ի՞նչ նշանակություն ունեցան դրանք փաստաթղթի վերջնական տարբերակի ձևավորման գործում:

**Երրորդ.** ի՞նչ հնարավոր ազդեցություն կունենա կառավարության որոշմամբ հաստատված սույն փաստաթուղթը կրթության զարգացման վրա:

**Չորրորդ.** որքանով է արդյունավետ ու գործուն համակարգային փոփոխությունների իրականացման իրագործված մեթոդաբանությունը [3]:

Սույն հոդվածով ներկայացնում ենք որոշակի դիրքորոշում այս հարցադրումների վերաբերյալ:

### ***Հայաստանի հանրակրթությունը***

Հարցը քննարկենք՝ առանձնացնելով հանրակրթության մասին առկա հայեցակարգային պատկերացումները և իրական իրողությունը: Ընդ որում, հանրակրթությունը կդիտարկվի որպես համակարգ՝ հետևյալ փոխկապակցված կտրվածքներով.

- Կրթության նպատակներն ու բովանդակությունը
- Ուսումնադաստիարակչական գործընթացները
- Մանկավարժական կադրերը
- Ֆինանսատնտեսական միջոցները
- Կառավարումը, կազմակերպումը, ղեկավարումը:

Ստորև փորձենք պարզաբանել՝ որքանո՞վ է փոխհամաձայնեցված վերոնշյալ փաստաթղթերի բովանդակությունը: Այնուհետև կառանձնացվեն այն կարևոր պրոբլեմները, որոնք բնորոշ են ներկա հանրակրթական իրողությանը: Այս հանգամանքներով էլ հենց պայմանավորված են հանրակրթական կրթակարգի մշակման և նոր պետական կրթական չափորոշիչների ստեղծման անհրաժեշտությունն ու անհետաձգելիությունը:

### ***Հանրակրթության համակարգի հայեցակարգային պատկերացումները մինչև վերջին փաստաթուղթը***

Դրանք ներկայացնում են հիմնականում հետևյալ փաստաթղթերը.

1. ՀՀ Սահմանադրությունը
2. «Կրթության մասին» ՀՀ օրենքը
3. «Միջնակարգ (լրիվ) ընդհանուր կրթության պետական չափորոշիչը հաստատելու մասին» ՀՀ կառավարության որոշումը [5]

4. «ՀՀ կրթության զարգացման 2001-2005 թվականների պետական ծրագիրը հաստատելու մասին» ՀՀ օրենքը [6]
5. ԿԳ նախարարության հաստատած հայեցակարգային, կանոնակարգային և ծրագրային փաստաթղթերը
6. Մանկավարժական կադրերի պատրաստման և վերապատրաստման հաստատությունների կանոնադրությունները և գործունեության կազմակերպման ծրագրերը:

Վերոհիշյալ փաստաթղթերով ամրագրված է հետևյալ հայեցակարգային պատկերը.

***Կրթության նպատակներն ու բովանդակությունը:*** Ըստ օրենքի՝

Կրթության բնագավառում պետական քաղաքականության հենքն ազգային դպրոցն է, որի գլխավոր նպատակը մասնագիտական պատշաճ պատրաստվածություն ունեցող և համակողմանիորեն զարգացած, հայրենասիրության, պետականության և մարդասիրության ոգով դաստիարակված անձի ձևավորումն է (Հոդված 4, կ.2):

ՀՀ կրթական համակարգը նպատակաուղղված է հայ ժողովրդի հոգևոր և մտավոր ներուժի ամրապնդմանը, ազգային և համամարդկային արժեքների պահպանմանն ու զարգացմանը: Այդ գործին իր նպաստն է բերում նաև Հայ եկեղեցին (Հոդված 4, կ. 3):

Ըստ չափորոշիչների՝

Միջնակարգ (լրիվ) ընդհանուր կրթության նպատակը քաղաքացիների մտավոր, հոգևոր և ֆիզիկական ընդունակությունների դրսևորման, դաստիարակության և զարգացման համար բարենպաստ պայմանների ստեղծումն է:

Տարրական դպրոցում ուսուցումը նպատակաուղղվում է լեզվամտածողության և մաթեմատիկական տրամաբանության հիմքերի ուսումնասիրության ու աշխատանքային նախնական հմտությունների ձևավորմանը, ազգային և համամարդկային արժեքներին նախնական հաղորդակցմանը:

Միջին դպրոցում ուսուցումը նպատակաուղղվում է առողջ ապրելակերպի, աշխարհի և բնության վերաբերյալ սովորողների գիտական պատկերացման ձևավորմանը, ինքնուրույն աշխատանքի, կրթության և հասարակական ինքնուրույն գործունեության համար անհրաժեշտ գիտելիքների նվազագույն ծավալի ապահովմանը:

Ավագ դպրոցում ուսուցումը նպատակաուղղվում է հենքային հանրակրթական պատրաստությունն ապահովող գիտելիքների յուրացմանը:

Դժվար չէ համադրել և նկատել օրենքով ամրագրված և չափորոշիչներով սահմանված նպատակների կապակցված չլինելն ու փոխադարձ անհամապատասխանությունը:

**Ուսումնադաստիարակչական գործընթացները:** Ուսումնադաստիարակչական գործընթացների բնույթը շատ աղքատ է ներկայացված: Ուսուցման կազմակերպման հիմնական ձևը դասն է: Որպես կանոն, ներկայացվում են այս գործընթացների կազմակերպման միջոցները, օրինակ՝ ուսումնական պլաններ, առարկայական ծրագրեր, ուսումնական ժամանակացույց

Ըստ զարգացման ծրագրի՝

Ուսուցման և տեղեկատվական ժամանակակից տեխնոլոգիաների ու մեթոդների ներդրում:

**Մանկավարժական կադրերը:** Ըստ զարգացման ծրագրի՝

Գիտամանկավարժական կազմի երիտասարդացում:

Մանկավարժական կադրերի պատրաստման համակարգի կատարելագործում:

Կադրերի որակավորման և վերապատրաստման համակարգի վերապատրաստում:

**Ֆինանսատնտեսական միջոցները:** Ըստ օրենքի՝

Պետական բյուջետային նպատակային ֆինանսավորում (Հոդված 4, կ. 5):

Ուսումնական հաստատությունը ֆինանսավորում է հիմնադիրը (Հոդված 46, կ. 1):

Հարաձուռն ֆինանսավորման սկզբունք (Հոդված 46, կ. 2):

Բարենպաստ հարկային քաղաքականություն (Հոդված 46, կ. 7):

**Կառավարումը, կազմակերպումը, ղեկավարումը:** Ըստ օրենքի՝

ՀՀ կրթության համակարգը պետական կրթական չափորոշիչների, կրթության հաջորդականությունն ապահովող տարբեր մակարդակի և ուղղվածության կրթական ծրագրերի, ուսումնական հաստատությունների և կրթության կառավարման մարմինների փոխկապակցված ամբողջությունն է (Հոդված 8):

Կրթության բնագավառում պետական քաղաքականության կազմակերպման հիմքը կրթության զարգացման պետական ծրագիրն է, որը Հայաստանի Հանրապետության կառավարման ներկայացմամբ հաստատում է ՀՀ Ազգային ժողովը (Հոդված 4, կ. 4):

Հանրակրթական հիմնական ծրագրերը ներառում են՝

ա. նախադպրոցական կրթությունը,

բ. տարրական ընդհանուր կրթությունը,

գ. հիմնական ընդհանուր կրթությունը,

դ. միջնակարգ (լրիվ) ընդհանուր կրթությունը,

ե. հատուկ ընդհանուր կրթությունը (Հոդված 10, կ. 2):

Ըստ օրենքի և ԿԳՆ փաստաթղթերի՝

Կազմակերպումը - դաս-դասարանային (Հոդված 46, կ. 1, կ. 2, կ. 6):

Ուսումնական հաստատությունը կառավարվում է միանձնյա ղեկավարման և ինքնավարության սկզբունքների գուգորդմամբ (Հոդված 40, կ. 3):

Ըստ զարգացման ծրագրի՝

Կրթության կառավարման ժողովրդավարացում:

Կրթության համակարգի կառավարման ապակենտրոնացում և ուսումնական հաստատությունների ինքնավարության աճ:

Վերոհիշյալ մեջբերումների նպատակն էր ցույց տալ, որ պետական կարևոր փաստաթղթերով արտահայտված հանրակրթության մասին հայեցակարգային պատկերացումները թերի են, ոչ ամբողջական, ոչ կապակցված, հաճախ իրարամերժ:

### ***Հանրակրթության ոլորտի ներկա իրողությունը***

***Կրթության նպատակներն ու բովանդակությունը:*** Կրթությունը նպատակաուղղված է հիմնականում գիտելիքների ու տեղեկությունների ձեռքբերմանը, երեխայի ընդհանուր զարգացման և անձի ձևավորման խնդիրները, ներառյալ մտագործունեության տարբեր տեսակների յուրացումն ու հոգևոր արժեքների ձևավորումը, մղված են երկրորդ պլան: Մասնավորաբար, չափից ավելի է կարևորվում սովորողների կողմից տեղեկատվության պասիվ ստացումն ու փաստերի մտապահումը:

***Ուսումնադաստիարակչական գործընթացները:*** Ուսուցման և դաստիարակության գործընթացները խիստ առանձնացված են և մեկուսացված: Դաստիարակությունն իրագործվում է ինքնաբերաբար, տարերային, չհամակարգված:

Ուսուցման գործընթացը խմբային բնույթի է, այն կազմակերպվում է ընդհանուր ճակատով և բացառում է ուսումնական խմբի յուրաքանչյուր անդամի գործուն ընդգրկվածության ապահովումը: Փաստորեն ուսուցման գործընթացը բնույթով ոչ թե հանրակրթային է, այլ սելեկտիվ [7]:

***Մանկավարժական կադրերը:*** Մանկավարժական կադրերի պատրաստումն ու վերապատրաստումն իրագործվում են հին ավանդական ձևերով: Բացակայում է կադրերի վերապատրաստման ու կատարելագործման ամբողջական հայեցակարգը: Խիստ նշմարելի են մանկավարժական կադրերի աշխարհայացքային հետամնացությունը և ցածրորակությունը:

***Ֆինանսատնտեսական միջոցները:*** Մանկավարժական կադրերի աշխատավարձերն ունեն սիմվոլիկ նշանակություն և չեն ապահովում մանկավարժների կենսագործունեության նվազագույն պահանջները:

Հանրակրթական հաստատությունների նյութատեխնիկական բազան անբավարար է և խիստ հնացած:

**Կառավարումը, կազմակերպումը, ղեկավարումը:** Նշմարելի են կառավարման փաստացի բացակայությունը և ղեկավարման կենտրոնացվածությունը: Փոխարենը արդյունքների գնահատումը խիստ ձևականացված է և ապակենտրոնացված, իսկ իրադրության վերլուծությունը կատարվում է տարերայնորեն:

Փոփոխությունները և նորամուծությունները կատարվում են հատվածաբար, չհամակարգված, քառսային, առանց ընդհանուր ամբողջական գաղափարախոսության (կամ հայեցակարգի):

### ***Հանրակրթության պետական կրթակարգը (նախագիծ). բնույթը և առանձնահատկությունները***

Հանրակրթությունը ժամանակակից քաղաքակրթության նվաճումներից է: Հենց հանրակրթական իմաստով վերաձևակերպված կրթական խնդիրները մարդկության համար դրսևորվեցին որպես պետական ու հասարակական կյանքի կազմակերպման բարդ հիմնահարց: Այսօր, փաստորեն, չկա մի երկիր, որը, բավարարված լինելով իր կրթական համակարգի իրավիճակով, չկարևորի այդ համակարգի բարեփոխման խնդիրը (տե՛ս, օրինակ, [13-14], [18-19], [27]) :

Ամենուրեք առաջնահերթ են հատկապես պետական կրթական քաղաքականության, կրթության զարգացման ծրագրերի և պետական կրթական չափորոշիչների մշակման հիմնահարցերը (տե՛ս, օրինակ, [16-17], [26]):

Պետական կրթակարգը (այսուհետ՝ կրթակարգ) հանրակրթության քաղաքականության հիմնական սկզբունքները, ուսման, ուսուցման և գնահատման չափորոշիչները սահմանող նորմատիվ փաստաթուղթ է:

Կրթակարգը սահմանում է կրթական քաղաքականության հիմնական սկզբունքները, ըստ հանրակրթության ուսումնական բնագավառների և միջնակարգ

հանրակրթական դպրոցի աստիճանների՝ սովորողներին ներկայացվող ընդհանրական պահանջները, հենքային ուսումնական պլանը, ուսումնական առարկաների չափորոշիչների ստեղծման, առարկայացանկի, դպրոցական չափորոշիչների և գնահատման համակարգի ձևավորման սկզբունքները:

### ***Կրթակարգի նախագծով ամրագրված նշանակալից նորույթները***

**12-ամյա կրթություն:** Միջնակարգ ընդհանուր կրթությունն իրականացվում է 12-ամյա ընդհանուր տևողությամբ (ընդգրկում է 6–8 տարեկան երեխաներին), եռաստիճան միջնակարգ հանրակրթական դպրոցում՝ հետևյալ հաջորդական աստիճաններով.

ա) տարրական դպրոց՝ 4 տարի (1-4-րդ դասարաններ)

բ) միջին դպրոց՝ 5 տարի (5-9-րդ դասարաններ)

գ) ավագ դպրոց՝ 3 տարի (10-12-րդ դասարաններ)

**Հանրակրթության բովանդակությունը:** Հանրակրթության բովանդակությունը ներկայացվում է առանձին ուսումնական բնագավառներով և բովանդակային բաղադրիչներով:

Կրթակարգով սահմանված են հետևյալ բովանդակային բաղադրիչները.

1. գիտելիքների համակարգ
2. ճանաչողության-մտածողության մեթոդներ
3. կարողություններ և հմտություններ՝
  - 3.1. հաղորդակցական
  - 3.2. համագործակցային
  - 3.3. ինքնակազմակերպման
  - 3.4. ստեղծագործական
4. արժեքային համակարգ:

Կրթակարգով սահմանված են հետևյալ ուսումնական բնագավառները.



1. հայոց լեզու և գրականություն
2. օտար լեզուներ
3. մաթեմատիկա
4. ինֆորմատիկա և SՏՏ
5. բնություն
6. անձ և հասարակություն
7. արվեստ
8. տեխնոլոգիա
9. ֆիզիկական կրթություն և անվտանգ կենսագործունեություն:

**Շրջանավարտի կատարելատիպը:** Կրթության նպատակների իրականացման արդյունքում ակնկալվում է, որ դպրոցի շրջանավարտը պետք է՝

ա) լինի մարդասեր, ազնիվ, հայրենասեր և պատասխանատվության զգացումով օժտված անհատ.

բ) ճանաչի իր հայրենիքը, տիրապետի մայրենի լեզվին, ընդունի այն արժեքները, որոնք սեփական ժողովրդի գոյատևման և առաջընթացի նախապայմանն են.

գ) ունենա պետական չափորոշիչով սահմանված գիտելիքների համակարգ և ձեռք բերած գիտելիքները կյանքում ստեղծագործաբար կիրառելու ունակություն.

դ) ունենա ինքնուրույն մտածելակերպ, տարբեր իրավիճակներում կողմնորոշվելու և որոշումներ կայացնելու ունակություններ, ի գորու լինի ընկալելու, վերլուծելու և կիրառելու հասարակական և տեխնոլոգիական նոր գաղափարներն ու նորամուծությունները.

ե) ի վիճակի լինի դրսևորելու փոխադարձ ըմբռնում և համագործակցություն ապահովող հարաբերություններ ինչպես տարեկիցների, այնպես էլ ծնողների, իրենից մեծերի ու փոքրերի հետ.

զ) լինի պետության, հասարակության, բնության և շրջակա միջավայրի լի-իրավ մասնիկն ու պաշտպանը.

Է) իմանա իր իրավունքներն ու պարտականությունները, լինի օրինապահ, նախաձեռնող և հասարակական ակտիվ դիրքորոշում ունեցող, ընտրություն կատարելու և իր ձայնի իրավունքը կիրառելու ունակ քաղաքացի.

ը) կարողանա վերլուծել հասարակական երևույթները, կողմնորոշվել հասարակական իրադարձություններում և ունենա հասարակական իրադրությունների վրա ազդելու գիտելիքներ ու կարողություններ.

թ) իմանա հայ ժողովրդի և համաշխարհային պատմությունն ու ճանաչի մշակութային արժեքները, իրազեկ լինի իր երկրի իրավական, տնտեսական և քաղաքական հիմքերին, գիտության և արվեստի նվաճումներին.

ժ) գիտակցի հայ ժողովրդի ու հայոց պետության դերը համաշխարհային քաղաքակրթության մեջ.

ժա) մտահոգվի ազգային խնդիրների լուծմամբ և պատրաստակամություն դրսևորի հայրենիքին ծառայելու գործում, լինի ազգային ավանդույթների, համամարդկային արժեքների պահպանողն ու փոխանցողը.

ժբ) ունենա այլ լեզուներով հաղորդակցվելու, ժամանակակից հաղորդակցման տեխնոլոգիաներից օգտվելու կարողություններ.

ժգ) լինի հոգեպես և ֆիզիկապես առողջ, իմանա առողջ ապրելակերպի, անվտանգ կենսագործունեության կանոնները և դրանք կիրառի կյանքում.

ժդ) գիտակցի ընտանիք կազմելու անհրաժեշտությունը, պատրաստ լինի ընտանեկան կյանքին, ինքնուրույն տնտեսավարմանը, ամուսնու և ծնողի դերին, տիրապետի տարրական մանկավարժական կարողությունների.

ժե) կարողանա ճիշտ գնահատել սեփական հնարավորություններն ու վարքը, համակված լինի լավատեսությամբ և սեփական ուժերի հանդեպ վստահությամբ, ցուցաբերի ինքնակրթությամբ և ինքնակատարելագործմամբ զբաղվելու ձգտում և կարողություններ.

ժգ) ունակ լինի իր նախասիրություններին, հետաքրքրություններին և հակումներին համապատասխան մասնագիտություն և աշխատանք ընտրելու:

**Կրթակարգի կատարելագործման հեռանկարները:** Կրթակարգն իր կառուցվածքով ճկուն է, մարդու և հասարակության կենսական պահանջներին ու պետության պատվերին համապատասխան փոփոխելի ու զարգացող:

Կրթակարգի վերահսկումն ու գնահատումն իրականացվում են նրա պահանջների կատարմանն աջակցելու, շարունակական զարգացումն ապահովելու, կիրառման ընթացքը գնահատելու և վերահսկելու նպատակով:

Հանրակրթական դպրոցներում և կրթության կառավարման մարմիններում իրականացվում են ներքին և արտաքին վերահսկողություն և գնահատում:

Վերահսկման և գնահատման արդյունքները հիմք են ծառայում կրթակարգի պահանջների վերանայման և կատարելագործման համար, ինչն իրականացվում է կրթակարգի մշակման և կատարելագործման համապատասխան հանրապետական կառույցի կողմից:

Կրթակարգի ներդրումն իրականացվում է ՀՀ կառավարության կողմից հաստատված 12-ամյա միջնակարգ կրթության անցումն ապահովող միջոցառումների ցանկի և ժամանակացույցի համաձայն:

Յուրաքանչյուր հինգ տարին մեկ անգամ Հայաստանի Հանրապետության կառավարությունը կրթության պետական կառավարման լիազորված մարմնի առաջարկությամբ հանրակրթության պետական կրթակարգում կատարում է անհրաժեշտ փոփոխություններ ու լրացումներ:

**Կրթակարգի նախագծում տեղ գտած թերությունները և չհաղթահարված պրոբլեմները:**

1. Որպեսզի ավելի հստակ պատկերացվեր, թե կրթակարգով նախատեսված հիմնադրույթները ինչով են պայմանավորված և կրթության ոլորտի ինչ նոր որակ են ենթադրում, արժեր, որ կրթակարգում ավելի հստակ և համարձակ

ներկայացվել կրթության ոլորտի ներկա իրավիճակը: Այս առիթով նախագծում առանձնացված էր միայն հետևյալը.

«Միջնակարգ հանրակրթական դպրոցում ուսումնական գործընթացի կազմակերպումը և կրթության բովանդակությունը պետք է բարեփոխվեն՝ հաշվի առնելով մի շարք հիմնախնդիրների առկայությունը: Մասնավորապես՝

- սովորողների ուսումնական բեռնվածությունը չափազանց մեծ է, իսկ կրթության բովանդակային պահանջները բարդ են և ուղղված են բարձր առաջադիմություն ունեցողներին,
- չափից դուրս է կարևորվում սովորողների կողմից տեղեկատվության պասիվ ստացումն ու փաստերի մտապահումը, բավարար չափով ուշադրություն չի դարձվում նրանց ճանաչողական-իմացական հմտությունների զարգացմանը,
- միևնույն դասարանի և տարբեր դասարանների կտրվածքով անբավարար է իրականացվում բովանդակության փոխհամապատասխանեցումը,
- ուսումնական ծրագրերը հիմնականում հրահանգչական բնույթ են կրում,
- առարկայական ծրագրերը բացարձակացնում են ուսուցչի և դասագրքի դերը՝ թերագնահատելով ուսուցման ժամանակակից մեթոդները և այլընտրանքային աղբյուրները,
- գործող չափորոշիչները չեն համապատասխանում XXI դարի պահանջմունքներին»:

2. Կրթակարգով սահմանված են հանրակրթության բովանդակային բաղադրիչները: Սակայն, ինչպես երևում է տարբեր հրապարակումներից ու քննարկումներից, հստակ ընկալում չկա, թե ինչ է նշանակում «կրթության բովանդակության բաղադրիչ» արտահայտությունը: Քանի որ կրթակարգում էլ է բացակայում հարցի բացատրությունը, այս կարևորագույն նորույթը մնում է ընթերցողների և մասնագետների կողմից չնկատված և չկարևորված:

3. Կրթակարգով ամրագրվում է դաս-դասարանային համակարգը՝ իր հիմնական ատրիբուտներով հանդերձ:
4. Կրթակարգում բացակայում են մանկավարժական նորարարության և նորամուծությունների կազմակերպման կարգն ու չափորոշիչները:
5. Մանկավարժական նորարարությունը ընդհանրապես չի կարևորվում:
6. Կրթակարգով հաստատագրված չէ մանկավարժական հասկացությունների համակարգը, իսկ փաստաթղթին բնորոշ է տերմինաբանական խառնաշփոթ:
7. Կրթակարգը լեցուն է անհարկի կրկնություններով և ավելորդ պարբերություններով (նման թերությունները վերացնելով հնարավոր է փաստաթղթի ծավալը կիսով չափ կրճատել):

### ***Հանրային քննարկումներ***

Հանրային քննարկումները կազմակերպվեցին մի շարք մակարդակներով:

Մարզերում և մի շարք խոշոր կրթական հաստատություններում եղան քննարկումներ ԿԳ նախարարի, նախարարության աշխատակիցների, կրթակարգը մշակող խմբի անդամների անմիջական մասնակցությամբ: Այդ քննարկումներին մասնակցում էին կրթության ոլորտի հարյուրից ավելի ներկայացուցիչներ: Բովանդակային առումով այդպիսի քննարկումները սակավ արդյունավետ էին: Դրանք ավելի շատ իմաստավորվում էին որպես քաղաքական ակցիաներ, որոնց ընթացքում նախարարը հավաստում էր իր պատասխանատվության աստիճանը և պատրաստակամությունը՝ իրականացնելու կրթակարգի դրույթները:

Լրատվամիջոցները այս կարևոր հարցի շուրջ բանավեճեր ծավալելու թույլ փորձեր կատարեցին: Սակայն անկողմնակալ ու բովանդակային իմաստով օգտակար կարելի է համարել մի քանիսը միայն (տե՛ս, օրինակ, [11-12], [24]):

Բազմաթիվ աշխատանքային կոլեկտիվներ և առանձին անհատներ իրենց դիտողություններն ու առաջարկությունները հանձնել էին կրթակարգը մշակող

խմբին՝ կրթակարգի վերամշակման ու կատարելագործման համար [տե՛ս Հավելվածը]: Սակայն դրանց մեծ մասն ուղղակի առաջին ընթերցման տպավորությունների արդյունք էր, ոչ թե կրթակարգի նախագծի լուրջ ուսումնասիրության և կատարելագործման նշանակալից առաջարկ:

Հարկ ենք համարում հատուկ առանձնացնել ՀՀ Կենտրոնական բանկի սեմինարների շրջանակում կազմակերպված քննարկումները [29]: Հինգ սեմինարների ընթացքում (մոտ մեկ ամիս) քննարկվում էին հանրակրթության հիմնախնդիրները տարբեր կտրվածքներով: Այդ քննարկումները նշանակալիորեն պայմանավորեցին նաև սույն հոդվածի կառուցվածքն ու բովանդակությունը, որի համար հեղինակն իր երախտագիտությունն է հայտնում սեմինարի բոլոր մասնակիցներին:

Առանձնահատուկ էր նաև ԿԳ նախարարության Կրթական բարեփոխումների կենտրոնի և «Մանկավարժական նախաձեռնություն» հայկական ասոցիացիայի կազմակերպած երկօրյա միջոցառումը, որի ծրագրով քննարկվում էին ներկա իրավիճակի և չհաղթահարված պրոբլեմների, հանրակրթության զարգացման ընթացքի և իրականացնելիության, կրթակարգի նորույթների, փաստաթղթի որակի վերաբերյալ հարցեր:

### ***Կառավարության որոշմամբ հաստատված փաստաթուղթը***

Վերջապես կառավարությունը 2004թ. մայիսի 27-ի նիստի N20 արձանագրությամբ հավաստեց երկու կարևորագույն փաստաթղթերի իրավասությունը՝ «Հայաստանի հանրակրթության կրթակարգը» և «Հանրակրթության պետական չափորոշիչները»: Առջևում է դեռ այդ փաստաթղթերով ենթադրվող հիմնադրույթների իրականացման հարցը՝ կրթության ոլորտում համակարգային փոփոխությունների իրագործման մեթոդաբանության խնդիրը:

Քննարկենք, թե ինչ նշանակալից տարբերություններ կան կրթակարգի նախագծի և կառավարության կողմից հաստատված փաստաթղթերի միջև:

**12-ամյա կրթություն:** Այս հարցը քննարկումների ժամանակ ամենաշատն էր քննադատվում և շահարկվում: Սակայն փաստաթղթի վերջնական տարբերակում հարցին վերաբերող տեքստը մնացել է միանգամայն անփոփոխ:

**Հանրակրթության բովանդակությունը:** Ուշադրություն դարձնենք հետևյալ հատվածի վրա.

«Յուրաքանչյուր ուսումնական բնագավառ ներկայացվում է կրթության բովանդակության հետևյալ բաղադրիչների միջոցով.

- գիտելիքների համակարգ,
- կարողություններ և հմտություններ,
- ճանաչողական, տրամաբանական,
- հաղորդակցական,
- համագործակցային,
- ստեղծագործական,
- ինքնուրույն գործունեության,
- արժեքային համակարգ»:

Եթե սա համեմատենք նախագծում շարադրված համապատասխան հատվածի հետ (այն զետեղված է սույն հոդվածի նախագծին վերաբերող բաժնում), առաջին հայացքից կթվա, թե կատարվել են ոչ էական խմբագրական փոփոխություններ: Սակայն նկատենք, որ բացակայում է երկրորդ կետով ամրագրված «Ճանաչողության-մտածողության մեթոդներ» արտահայտությունը՝ հանրակրթության բովանդակության բարեփոխման և զարգացման խնդիրների հետ կապված ամենաէական և ամենաարժեքավոր նորույթը [15],[20]:

**Շրջանավարտի կատարելատիպը:** Այս ենթակետը փաստաթղթի վերջնական տարբերակում վերանվանված է «Միջնակարգ հանրակրթական դպրոցի շրջանավարտի նկարագիրը»:

Եթե համեմատենք նախագծային տարբերակի հետ, ապա կնկատենք, որ անմեղ թվացող խմբագրական փոփոխությունների հետևանքով աննկատելիորեն դուրս են մղվել արժեքավոր դրույթներ:

Օրինակ՝ նախագծի «Ժգ» կետը վերջնական տեքստում վերարտադրվել է «Ժա» կետում առանց «լինի հոգեպես և ֆիզիկապես առողջ» արտահայտության: Այսինքն, ըստ նախագծի՝ աշակերտը «պետք է լինի», իսկ ըստ վեջնական փաստաթղթի՝ նա ընդամենը պետք է իմանա և կյանքում կիրառի:

Եթե պահանջում ենք, որ աշակերտը լինի, ուրեմն ամրագրում ենք, որ դպրոցը դրա համար պատասխանատու է, այսինքն հետևում է՝ կդառնա՞ արդյոք աշակերտը այդպիսին և ի՞նչ է դրա համար անհրաժեշտ անել: Իսկ եթե պահանջում ենք, որ նա ընդամենը իմանա, ապա հետևում ենք՝ գիտի՞ նա արդյոք այդ մասին և կարո՞ղ է արդյոք մեր հարցին ճիշտ պատասխանել, այսինքն՝ վերարտադրել սերտած նախադասությունները: Ահա էական տարբերությունը:

Նախագծի «դ» կետը վերաշարադրվել է «ե» կետի տակ, առանց «և որոշումներ կայացնելու ունակություններ, ի գործու լինի ընկալելու, վերլուծելու և կիրառելու հասարակական և տեխնոլոգիական նոր գաղափարներն ու նորամուծությունները» արտահայտության, որն այդ կետի առավել արժեքավոր և իմաստալից կտորն է: Ըստ երևույթին խմբագրական խումբն անզգուշաբար ենթադրել է, թե ոչինչ չասող և ոչինչ չպահանջող «ինքնուրույն մտածելակերպ» արտահայտությունը ներառում է մեր ժամանակների համար շատ կարևոր որակ ներկայացնող «նորը ընկալելու, վերլուծելու և կիրառելու» արտահայտությունը: Խոսքը գուտ ձևական տարանջատումների մասին չէ: Բանն այն է, որ հենց այդ նրբություններից է կախված, թե ինչպիսին պետք է լինեն ուսումնադաստիարակչական ծրագրերը և ինչին ու ինչպես պետք է հետևեն մանկավարժները աշակերտների հետ տասներկու տարի անընդհատ աշխատելիս:

Նախագծի «ը» կետում շարադրված միտքը վերջնական փաստաթղթում ընդհանրապես բացակայում է: Ցավոք, չի գիտակցվել, որ այդ արտահայտությունն առանձնացնում ու մատնանշում է ժամանակակից հանրակրթության բովանդակության առանցքը:



## ***Հետևություններ***

Փորձենք ամփոփել՝ առաջնորդվելով նախաբանում ձևակերպված հարցադրումներով:

**Առաջին.** որքանո՞վ էին անհրաժեշտ ու անհետաձգելի հանրակրթական կրթակարգի մշակումը և նոր պետական կրթական չափորոշիչների ստեղծումը:

Անժխտելի է կրթակարգի մշակման և պետական կրթական չափորոշիչների ստեղծման անհրաժեշտությունը: Ինչպես վերը նշեցինք, կրթության վերաբերյալ հայեցակարգային պատկերացումները թերի են, չհամակարգված, ոչ ամբողջական: Կրթական ոլորտի պրոբլեմները համակարգային բնույթի են: Անժխտելի է նաև, որ նոր փաստաթուղթը ապահովում է որոշակի առաջխաղացում այս ուղղությամբ: Սակայն խնդրի լուծումը դեռ առջևում է:

**Երկրորդ.** Ի՞նչ իմաստ ունեին նախագծի հանրային քննարկումները և ի՞նչ նշանակություն ունեցան դրանք փաստաթղթի վերջնական տարբերակի ձևավորման գործում:

Ցավոք, հանրային քննարկումներն իմաստազրկվեցին: Դրա հիմնական պատճառը նման քննարկումների կազմակերպման և քննարկման արդյունքների ընդհանրացման մեթոդների ու մեխանիզմների բացակայությունն էր: Փաստորեն փաստաթղթի վերջնական տարբերակը իր բովանդակային խորիմաստությամբ զիջում է նախագծին:

**Երրորդ.** Ի՞նչ հնարավոր ազդեցություն կունենա կառավարության որոշմամբ հաստատված սույն փաստաթուղթը կրթության զարգացման հետագա ընթացքի վրա:

Իհարկե, 12-ամյա կրթության անցնելու խնդիրը երկար ժամանակ կապահովի մեր մասնագետների զբաղվածությունը. անհրաժեշտ կլինի մշակել նոր ծրագրեր, ստեղծել նոր դասագրքեր, կազմակերպել ուսուցիչների վերապատրաստման դասընթացներ... Ցավոք, արտաքինապես արմատական փոփոխությունների տպավորու-

թյուն թողնող այս երևույթը դժվար թե էական ազդեցություն ունենա կրթության որակի բարձրացման հիմնահարցերում:

Սակայն նորարարության ջատագովները նոր հնարավորություններ են ստանում ազատություն տալու իրենց ստեղծագործական պոռթկումներին: Սա, անկասկած, նոր փաստաթղթի ամենաարժեքավոր նշանակությունն է:

**Չորրորդ.** որքանով է արդյունավետ ու գործուն համակարգային փոփոխությունների իրականացման իրագործված մոտեցումը:

Նախ՝ ինչ մոտեցման մասին է խոսքը. ստեղծվում է աշխատանքային խումբ, որը մշակում է անհրաժեշտ հիմնադրույթները և կազմում համապատասխան նախագիծը: Այն դրվում է հանրային քննարկման, որից հետո փաստաթուղթը վերամշակվում է և ներկայացվում հաստատման:

Հերթական անգամ կիրառվեց այս մոտեցումը, և ևս մեկ անգամ դրսևորվեց դրա ցածր արդյունավետությունը: Անկասկած, բարի են հանրային կարծիքի հետ հաշվի նստելու շարժառիթները: Սակայն կարևոր նշանակություն և խոր մասնագիտական բնույթ ունեցող հարցերում հասարակական գիտակցության ձևավորման խնդիրը դառնում է ավելի առաջնային ու կարևոր, քան հանրային կարծիքը հաշվի առնելը: Սա արդեն ենթադրում է հասարակական համակարգային փոփոխությունների իրականացման այլ մեթոդաբանություն (տե՛ս, օրինակ, [21-25]):

### ***Առաջարկություններ ստեղծված իրավիճակը շտկելու համար***

#### ***(վերջաբանի փոխարեն)***

Առաջին հերթին պետք է կասեցնել այն որոշումը, որի համաձայն արդեն 2006թ. դպրոց հաճախող բոլոր երեխաները պետք է սովորեն 12-ամյա հանրակրթական համակարգում:

Անհրաժեշտ է առանձնացնել հենքային դպրոցներ՝ տասից ոչ ավելի, որտեղ կսկսվեն 12-ամյա կրթության անցման աշխատանքները: Հենց այս դպրոցներում

պետք է մշակվեն և իրականացվեն նոր համակարգին բնորոշ ուսումնադաստիարակչական ծրագրերն ու ուսումնադիդակտիկ նյութերը: Այս դպրոցները պետք է դրսևորվեն որպես մանկավարժական կառուցումների նորարարական տարածքներ, որտեղ համատեղ գործունեություն կծավալեն մանկավարժ գիտնականները, մեթոդիստները, օրենսդիրները, տնտեսագետները, ուսուցիչները, կրթության կազմակերպիչներն ու կառավարիչները:

Այնուհետև անհրաժեշտ է առանձնացնել հանրապետության տարբեր շրջաններն ընդգրկող հարյուր դպրոցներ, որտեղ կներդրվեն վերոնշյալ առաջանցիկ տասը դպրոցներում իրականացված նվաճումները: Միաժամանակ այս դպրոցներում կմշակվեն նորամուծությունների իրականացման ձևերն ու եղանակները, ներառյալ ուսուցիչների պատրաստման ու վերապատրաստման ծրագրերը, մեթոդներն ու միջոցները: Փաստորեն այս դպրոցները նոր համակարգին կանցնեն նախորդներից մեկերկու փուլ ետ մնալով:

Եվ, վերջապես, այս հարյուր տասը դպրոցների հենքի վրա հնարավոր կլինի հանրապետության բոլոր դպրոցներում հիմնավոր անցնել 12-ամյա կրթության համակարգի (այս մեթոդաբանության մասին ավելի մանրամասն տե՛ս, օրինակ, [25], [30-31]):

Նկատենք, որ նման մոտեցման դեպքում նոր համակարգին զանգվածային անցումը կսկսվի մոտավորապես 2010թ.<sup>՝</sup> համեմատաբար նախապատրաստված և ավելի զգույշ [32]:

Նշենք, որ վերոնշյալ մեթոդաբանությունը հնարավորություն է տալիս գործնական կառուցումներին զուգընթաց կատարելագործել նաև կրթակարգի բովանդակությունը: Դա շատ կարևոր է, քանի որ ժամանակակից պահանջները բավարարող նոր կրթական համակարգը ենթադրում է արմատական ավելի խոր փոփոխություններ, քան առաջարկում է կրթակարգը (տե՛ս, օրինակ, [8-10], [28], [34-35]):

## Լրացուցիչ պարզաբանումներ և տեղեկություններ

1. Հանրակրթության պետական կրթակարգ (նախագիծ), ՀՀ ԿԳՆ, Երևան, 2004:  
[Որպես կրթակարգը մշակող աշխատանքային խմբի անդամ՝ հարկ եմ համարում վկայել, որ խումբը համալրված էր կրթության ոլորտի բանիմաց ու փորձառու մասնագետներով: Խմբի անդամները լրջորեն ուսումնասիրել էին համաաշխարհային փորձը և առաջավոր մանկավարժագիտական ուղղությունները: Ներխմբային քննարկումները հարուստ էին բովանդակալից ու արդյունավետ բանավեճերով: Չնայած այս հոդվածում ներկայացված է իմ խիստ քննադատական վերաբերմունքը, սակայն հավաստում եմ իմ անձնական պատասխանատվությունը կրթակարգի նախագծի յուրաքանչյուր բառի համար]:
2. Հայաստանի հանրակրթության կրթակարգը և պետական չափորոշիչները: Հաստատված է ՀՀ կառավարության 2004թ. մայիսի 27-ի նիստի N20 արձանագրությամբ:
3. Ընդհանրապես Հայաստանի Հանրապետության անկախացումը առաջ քաշեց պետականակերտման և հասարակական կյանքի ինքնուրույն կազմակերպման բավականին լուրջ ու դժվար խնդիրներ: Դրանց թվում կարևորներից մեկը կրթության ոլորտի կազմակերպման, կառավարման, ինչպես նաև ներուլորտային և արտաուլորտային հարաբերությունների կարգավորման խնդիրն է: Այս խնդիրների բարդությունը պայմանավորված է մի շարք հանգամանքներով:
  - Նախ, Խորհրդային Հայաստանում գործում էր արդեն կայացած և արմատավորված կրթական համակարգ, որի իներցիոն ընթացքի հաշվին հնարավոր եղավ հետխորհրդային շրջանում պահպանել ու ապահովել կրթության ոլորտի գործառնությունը: Սակայն նոր պայմաններին հարմարեցված այդ համակարգն իր բնականոն դիմակայությամբ արդեն խոչընդոտում է համակարգային փոփոխություններին [4]:
  - Երկրորդ. տնտեսապես զարգացած երկրները ստեղծել են նաև զարգացած կրթական համակարգեր, որոնք թյուրիմացաբար ընկալվում են որպես ընդօրինակման գայթակղիչ նմուշներ:
  - Երրորդ. պետական, քաղաքական ու հասարակական գործիչների շրջանակներում համատարած է այն կարծիքը, թե իբր նոր զարգացող կամ, այսպես կոչված, անցումային շրջանում գտնվող երկրների համար գոյություն ունեն ընդհանուր օրինա-

չափություններ, որոնք էլ պետք է հանդիսանան այդ երկրների զարգացման ուղեցույցները: Կրթության ոլորտում այս հանգամանքը դրսևորվում է նրանով, որ կրթական նոր համակարգի ստեղծման հարցը վերածվում է առաջավոր երկրների փորձի տեղայնացման ու ներդրման խնդրի:

Ցավոք, առայժմ հասարակական վերակառուցումների բարդ խնդիրները լուծվում են ապրիորի մոտեցումներով, ինչի արդյունքում տիրում է մեթոդաբանական անարխիան:

4. Հետխորհրդային շրջանի կրթության ոլորտն արդեն հասցրել է նշմարվել իր յուրահատուկ պատմությամբ, որի վերլուծությունն ու ուսումնասիրությունը, անկասկած, օգտակար կլինի ոլորտի հետագա զարգացման համար: Առայժմ հետաքրքրություն կարող են ներկայացնել հետևյալ աշխատությունները.

- *Մկրտչյան Մ.Ա., Մերոյան Գ.Օ., Դավթյան Ն.Կ.,* О системе образования Армении, Педагогика, N1, 1998.
- *Հարությունյան Շ., Դավթյան Ն.* և ուրիշներ, Կրթությունը Հայաստանում, Եր., Անտարես, 2002:
- *Մկրտչյան Անահիտ,* Ետխորհրդային Հայաստանի կրթության ծրագրման առանձնահատկությունները և սկզբունքները, Ռազմավարական և ազգային հետազոտությունների հայկական կենտրոն, փետրվար, 1997:

5. Միջնակարգ (լրիվ) ընդհանուր կրթության պետական չափորոշիչ // Հաստատված է ՀՀ կառավարության 2000 թվականի մայիսի 8-ի որոշմամբ:
6. Կրթության զարգացման 2001 – 2005 թվականների պետական ծրագիր // Հայաստանի Հանրապետության Օրենք: Ընդունված է 2001 թվականի հունիսի 26-ին:
7. Ընդհանրապես հանրակրթական գործընթացներում ելակետային պրոբլեմը ուսումնական խմբի յուրաքանչյուր անդամի գործուն ընդգրկվածության ապահովման հարցն է: Այս պրոբլեմի ելակետայնությունը նշանակում է, որ նրանով են պայմանավորված և նրա ուղղակի կամ անուղղակի հետևանքն են հանրակրթության քիչ թե շատ հետաքրքրություն ներկայացնող մյուս պրոբլեմներն ու դժվարությունները: Նշենք, որ կրթադաստիարակչական գործընթացում ուսումնական խմբի յուրաքանչյուր անդամի գործուն ընդգրկվածության ապահովման հարցը ուսուցչի վարպետու-

թյան կամ աշակերտի ցանկության ու կամքի հարց չէ. այն պայմանավորված է գործընթացի բնույթով և դաս-դասարանային համակարգի շրջանակներում դրսևորվում է որպես անլուծելի պրոբլեմ: Նշենք նաև, որ հանրակրթության բովանդակության պրոբլեմը (հատկապես բովանդակության միավորի որոշման խնդիրը) կարևորագույններից է: Սակայն հենց այն հանգամանքը, որ հասարակական մակարդակով գտնված ու յուրացված չեն ամեն մի երեխայի կողմից անհրաժեշտ կրթության բովանդակության յուրացումը ապահովող մանկավարժական տեխնոլոգիաները, ուսուցման կազմակերպման ներկա եղանակի սահմանափակումների հաղթահարման պրոբլեմը դառնում է առաջնային:

8. *Մկրտչյան Մ.Ա.*, Կրթության կազմակերպման կոլեկտիվ եղանակի կայացման հիմնահարցերը, «Մանկավարժական նախաձեռնություն» հայկական ասոցիացիա, Երևան, 2001, էջ 120:
9. Քաղաքացիական կրթությունը դպրոցում. մանկավարժական գիտամեթոդական հանդես, ## 1-4, «Մանկավարժական նախաձեռնություն» հայկական ասոցիացիա, Էդիտ Պրինտ, Երևան, 2001-2002:
10. Մանկավարժություն. գիտամեթոդական վերլուծական ամսագիր # 1, 2003, ԿԳՆ Կրթական բարեփոխումների կենտրոն:
11. Կլոբ սեղան, «Մանկավարժություն» ամսագիր, #4, 2003, էջ 16-26:
12. *Մերոբ Խաչատրյան* // «Կրթություն» շաբաթաթերթ, 2003թ. (հոկտեմբեր)
13. *Дьяченко В.К.*, Новая дидактика, М., Народное образование, 2001.
14. *Сузуки И.*, Реформа образования Японии: навстречу XXI веку, // Перспективы, Вопросы образования, М., 1991, N1.
15. *Ղափթյան Ն.*, Կրթության բովանդակության ներկա հիմնախնդիրները, «Մանկավարժություն» ամսագիր N4, 2003, էջ 6-15:
16. Равные возможности для всех детей. Проект программы реформ в области образования Президента США Джорджа Буша, см. ж. «Народное образование», N 8, 2002, стр. 15-38. Русский перевод из открытого источника: [http:// www.mcsme.ru/edu](http://www.mcsme.ru/edu) .
17. *Дмитриев Д.*, Ответственность государства за образованность граждан, Народное образование, N 10, (декабрь), 1996.

18. *Филиппов В. М.*, Модернизация российского образования, ж. Педагогика, N3, 2004, стр. 3-11.
19. *Джуринский А.Н.*, Реформы зарубежной школы. Надежды и действительность, М., Знание, 1989 (серия „Педагогика и психология,, N7)
20. *Давыдов В.В.*, Теория развивающего обучения., М., ИНТОР, 1996.
21. *Громыко Ю.В.*, Проектирование и программирование развития образования, М., МАРО, 1996.
22. *Попов С. В.*, Методология организации общественных изменений, ж. Кентавр, N 26, (июнь 2001г), стр 2-13.
23. *Միտյան Մ.Ս.*, Ուսուցման կոլեկտիվ եղանակի ստեղծման Կրասնոյարսկի փորձը, «Վասն արդարության», 41, 2001:
24. *Մրի Մարտիրոսյան*, Ինչպես համատեղել հասարակական կարծիքն ու մասնագիտական միտքը, «Ազգ» օրաթերթ, 1.04. 2004.
25. *Литвинская И.Г.*, Наше общее дело, ж. «Русский язык в Армении», N1, 1999, стр. 47-51.
26. *Краевский В.В., Хуторский А.В.*, Предметное и надпредметное в образовательных стандартах., ж. «Педагогика», N 2, 2003.
27. *Брайан Саймон.* Общество и образование, М., Прогресс, 1989, с. 200.
28. *Зинченко А.П.* Игровая педагогика, Тольяти, МАББ, 2000  
([www.circle.ru/kentavr/TEXTS/025ZIN.ZIP](http://www.circle.ru/kentavr/TEXTS/025ZIN.ZIP)).
29. Ավելի քան չորս տարի է, ինչ ՀՀ Կենտրոնական բանկում, նախագահ Տիգրան Սարգսյանի ղեկավարությամբ ընթանում են ընդհանուր մեթոդաբանական սեմինարներ: Այստեղ քննարկվում և մշակվում են ՀՀ զարգացմանը վերաբերող կարևորագույն հարցեր՝ ամենատարբեր ու բազմակողմանի կտրվածքներով: Սեմինարները կազմակերպվում են ամսական երկու անգամ՝ շաբաթ օրերին: Դրանք ունեն հիմնական մասնակիցների կազմ, որոնք ներկայացնում են հասարակության տարբեր ոլորտները:
30. *Литвинская И.Г.*, Полигон будущего., Учительская газета, 1999.
31. *Громыко Ю.В., Дмитриев Д.*, ж. «Народное образование», N 5, 1995.

32. Ցավոք, ԿԳ նախարարության և ՀԲ ԿԾԿ համատեղ ծրագրով մշակվել է ուսուցիչների վերապատրաստման ծրագիր և ձեռնարկ (տե՛ս [33]), որն իր բովանդակությամբ և որակով խիստ անընդունելի է: Նախ այն պատճառով, որ բոլորովին կապ չունի կրթակարգի հետ: Երկրորդ, այն պատճառով, որ չի համապատասխանում ժամանակակից մանկավարժագիտության նվաճումներին: Երրորդ, այն պատճառով, որ չի պարունակում ստեղծագործական նորություններ, այլ ներկայացնում է մի շարք արտասահմանյան աշխատություններից անհաջող ընտրված նյութերի թարգմանություն: Եվ չորրորդ, այն պատճառով, որ չի ենթարկվել ներքին փորձագիտական քննության:
33. Մասնագիտական զարգացման ձեռնարկ, ԿԳ նախարարության Կրթական բարեփոխումների կենտրոն:
34. *Щедровицкий Г.П. и др.*, Педагогика и логика., М., «Касталь»,1992.
35. *Громыко Ю.В., Давыдов В.В.*, Образование как средство формирования и выращивания практики общественно-регионального развития, Международный региональный журнал Россия-2010, N 1, 1993.



## Հ Ա Վ Ե Լ Վ Ա Ծ

«Նորավանք» ԳԿՀ-ն իր ներքին քննարկումների արդյունքում ներկայացրել էր դիտողություններ ու առաջարկություններ, որոնց բովանդակությունը հետևյալն էր.

### Կարծիք

#### «Հանրակրթության պետական կրթակարգի» փաստաթղթի մասին (ընդունված է «Նորավանք» ԳԿՀ-ում կազմակերպված քննարկումների հիման վրա)

1. Կրթակարգում բացակայում է օրգանական կապը գիտելիքի ձեռքբերման նախադպրոցական և հետդպրոցական գործընթացի մյուս բաղադրիչների (մանկապարտեզ, պրոֆտեխուսումնարան, բուհ, գիտական և տեխնոլոգիական համակարգ) հետ: Անընդունելի է կրթակարգ մշակել ՀՀ գիտության հայեցակարգի ու գիտական պահանջմունքների համատեքստից դուրս: Մա վկայում է կրթակարգի մշակման մեթոդաբանական սկզբունքային թերության մասին և արժեզրկում է կատարված մեծ ծավալով աշխատանքը: Մասնավորապես ներքոհիշյալ 2 կետում նշված հիմնարար բնույթի բացթողումները պայմանավորված են այս թերությամբ:

2. 12-ամյա դպրոցի դեպքում, հաշվի առնելով նաև գորակոչը, տղաները մագիստրատուրան կավարտեն նվազագույնը 26 տարեկանում, իսկ ասպիրանտուրան՝ 29 տարեկանում (այլընտրանքային ծառայության դեպքում ավելանում է ես 1.5-2 տարի): Այսինքն՝ տղաները գիտական աշխատանքով կարող են զբաղվել 30 տարեկանի սահմաններում, ինչը մեկնարկային չափազանց անբարենպաստ պայմաններ կստեղծի նրանց համար նեղ մասնագիտացման ուղղությամբ ընթացող համաշխարհային գիտության և գիտական ոլորտում (մասնավորաբար սրընթաց զարգացող տեղեկատվական տեխնոլոգիաների բնագավառում) սուր մրցակցության պայմաններում:

3. Կրթակարգում հիմնավորված չէ նախատեսվող հիմնական փոփոխություններից մեկի 12-ամյա դպրոցի անցնելու անհրաժեշտությունը: 12-րդ դասարանում, ուսումնական տարվա երկրորդ կեսում նախատեսված ոչ ուսուցողական գործընթացը սողանցքներ է թողնում կրկնուսուցման (ռեպետիտորության) և այլ անցանկալի երևույթների համար: Այսպիսով, կրթակարգի հիմնական թեզերից մեկը հեռու է մշակված լինելուց:

4. Կրթակարգը նպատակ ունի ՀՀ քաղաքացու, բայց ոչ նաև հայ ազգի անդամ անհատի ձևավորումը, ինչը, հաշվի առնելով մեր առանձնահատկությունները, ռազմավարական հարց է: Կրթակարգում հանդիպում ենք հակասության. «Հանրակրթության կազմակերպման դրույթները» բաժնում ասվում է, որ կրթությունը «պետք է իրականացվի ազգային արժեքների հենքի վրա», մինչդեռ հենց «Նախաբանում» գրված է. «Կրթակարգը մշակվել է միջազգային ժամանակակից փորձի հիման վրա Հայաստանի Հանրապետության սոցիալական, տնտեսական, քաղաքական, գիտակրթական, մշակութային գործոնների հաշվառմամբ»: Որպես հետևանք նման մոտեցման, կրթակարգում ընդունված է աշակերտակենտրոն ուսուցման մեթոդը, ինչը հակադրվում է ուսուցչակենտրոն ուսուցմանը, որը ՀՀ-ում ընդունված ու կիրառվող ձևն է՝ ժառանգված դեռևս Մաշտոցի ժամանակներից, ապացուցել է իր արդյունավետությունը և հարիր է մեր հոգեկերտվածքին, ի տարբերություն աշակերտակենտրոն ուսուցման: Հատուկ նշենք, որ յուրաքանչյուր հայեցակարգ կազմելիս միջազգային փորձի հաշվի առնելն, անշուշտ, անհրաժեշտություն է: Սակայն միջազգային փորձի արհեստական ներդրումը, ինչպես ցույց է տալիս հայտնի փորձը, միշտ չէ, որ դրական հետևանքներ է ունենում:

5. Կրթակարգում տեղ են գտել հակասություններ, մինչև իսկ տրամագծորեն հակառակ մեկնաբանությունների տեղիք տվող դրույթներ ու արտահայտություններ, անավարտ կամ կիսատ ձևակերպումներ: Հակասություններ կան նաև կրթակարգի և, ընդհանուր վերցրած, կրթական բարեփոխումների մյուս ծրագրերի միջև: Կրթակարգը մշակող խմբի որոշ անդամների խոստովանությամբ, այս փաստաթղթի ավելի քան կեսը մշակված չէ: Նման երկիմաստությունը, կրթակարգի հնարավոր ընդունման պարագայում, հետագայում անորոշությունների է հանգեցնելու:

Քննարկումների ընթացքում ուշադրություն է դարձվել նաև կրթության ոլորտում վարկերի արդյունավետ ու նպատակային օգտագործման հարցին: Նշվել է, որ Համաշխարհային բանկի կրթական բարեփոխումների համար տրամադրվելիք վարկով կարելի է յուրաքանչյուր դպրոց համալրել առնվազն 20 համակարգչով, այսինքն՝ համակարգիչ/աշակերտ ցուցանիշը դարձնել մոտ 1/20, ներկայիս 1/360 պարագայում:

Երևան, 26 մարտի 2004թ.

«Նորավանք» գիտակրթական հիմնադրամ»